



**PUO EA MOHLOMPHEHI TONA-KHOLO  
DR. MOEKETSI MAJORO, MALEBANA LE HO  
KHAKOLA HO KENA TŠEBETSONG HA  
LETŠOLO LA HO KHUTLISA TŠEPO EA  
SECHABA  
KHAHLANONG LE BOTLOKOTSEBE BO JELENG  
SETSI KA HARE HO NAHA EA LESOTHO  
(OPERATION RESTORE HOPE).  
MASERU- 13 MPHALANE, 2020**

Sechaba sa heso, ntumelleng ke qale polelo ena eaka ka hore ke hlomphe:

Motlotlehi Letsie III, Hlooho ea Naha ea Lesotho;

Mookameli oa Ntlo ea Senate;

Motsamaisi oa Lipuisano ka Ntlong ea Bakhethoa ba Sechaba;

Ea tsoereng Molepo ele Moahloli e Moholo;

Motlatsi oa Tona-Kholo;

Bahlomphehi Matona a khabane a 'Musu oa Motlotlehi; le Batlatsi ba Matona;

Liofosiri tse kholo tsa 'Musu oa Motlotlehi;

Baokameli ba Litsi tsa Tšireletso;

Litho tsa Mafapha a Bophatlalatsi; le

### **Sechaba Sohle sa Basotho;**

Bohle re tla hopola hore e se e le ka makhetlo a mangata joale, ke hlaha kapele ho lona, ke ngongorehile ke liketso tsa botlokotsebe tse jeleng setsi ka hare ho naha ea Lesotho. Liketso tsena, li kenyeletsa lipolao tse sehloho tsa batho, tthekefetso ea maqheku, basali, le masea, ho sa natsoe litokelo tsa bona tsa mantlha, *ke bo ramatla ba iphetotseng lipoho tsa khothu metseng le metsaneng ea rona*. Re boetse re bona keketseho ea lipolao tse sehloho tsa batho, bosholu ba boqhobane, bosholu ba makoloi e sita le bosholu ba liphoofolo.

Liketso tsena tsa botlokotsebe, li sisinya metheo ea puso ka ho hlokisa naha ena ea rona khotso le botsitso. Li boetse li re tlosa seriti machabeng moo ka lilemo tse telele re tsebiloeng re le sechaba sa khotso seo mothehi oa sona, Morena Moshoeshe a se bopileng ka ho kopanya merabe e fapaneng, tlasa sekhele sa khotso le kutloelano bohloko. Khotso eona eo, ke eona eo Morena Moshoeshe a bileng a e bitsa khaitseteli ea hae, e le hore hlokomelisa le ho re ruta bohlokoa ba eona, re le Sechaba. Kajeno ha ke bua le lona tjena, re fapohile tseleng ena eo baholo ba rona ba re fileng eona. Ha re hopoleng hle Basotho ba heso, hore Sechaba se itoantšang se fetoha lesupi, etsoe motse ho ahoa oa Morapeli Thesele.

### **Basotho Ba heso,**

Ke lakatsa ho boela ke le hopotsa hore naha e apareloang ke liketso tsa bokoeta le botlokotsebe e ba le qholotso e kholo ea ho nyotobela ha moruo ho bakoang ke ho ba leqe ha batseteli ho theha mesebetsi naheng e joalo. Bohle le lipaki hore linaha tsohle tsa lefatse, ho kenyeletsa le eona ena ea rona, li angoe hampe ke lefu lena la Covid-19 leo ka bomali mabe le re tliselitseng masisapelo a sechaba se sengata se lahlehetsoeng ke mesebetsi le mekhoa ea boipheliso. Re lokela ke hona ho tšoaranang ka matsoho re le sechaba ho fenyha maemo a na le ho haha bocha moruo oa naha ea rona o maqakabetsing.

Hore re fihlele katleho tabeng ena, re lokela ho loantša ka matla litlolo tsa molao tseo ke seng ke bontšitse hore li iphetotse tšupa ka hare ho sechaba sa Basotho.

Ele ho fihlela sena, rele 'muso, re entse qeto ea ho theha Lebotho le kopanetsoeng ke mafapha a latelang a tsireletso; Sesole sa Lesotho (LDF), Sepolesa sa Lesotho (LMPS), le Mautloela a Naha (NSS). Lebotho lena le reretsoe ho tla loantša ka matla a maholo liketso tse soto tse hlokisang naha botsitso.

Kajeno ke motlotlo ho phatlalatsa ka molao hothakholoa ha tšebetso ea Lebotho lena e bitosang "Operation Restore Hope", eleng tšebetso e reretsoeng ho khutlisa tšepo sechabeng ka maemo a polokeho ea maphelo le thepa ea sona. Ke qetella ka ho mema Sechaba sohle sa Basotho ho tšoarana ka matsoho le Lebotho lena tšebetsong ena ea bohlokoa ea ho fenyha litlolo tsa molao.

**KHOTOSO PULA NALA!!!**